



Aqqalu C. Jerimiassen
Atassut

UKA 2021/23
5. oktober 2021

Uunga siunnersuut: Uranimik il. il., misissueqqaarnermut, ujaasinermut piiaanermullu inerteqquteqarneq pillugu Inatsisartut inatsisaat

(Ineqarnermut, Attaveqaasersuutinut, Aatsitassanut, Inatsisit Atuutsinneqarnerannut Naligiisitaanermullu Naalackersuisoq)

Uran parteeqanngilaq! Taamak erseqqitsigisumik oqariartuuteqarumavugut Atassummiit inuiaqatigiinnut.

Naak naalackersuisut saqqummiussaata paasinarluinnaraluartoq, naalackersuisooqatigiinnissamullu isumaannut tulluulluinnaraluartoq apeqqut ataaseq annertoq Atassummiit kaaverusaartipparput. Ukiut sisamakkaarlugit inatsit allanngortassanerluni nunami aquttunngortut nikittarnerisigut?

Takoreerparpummi naalackersuisooqatigiissimasut siulliisa aallulluinnarlugu qinngornernik ulorianartortalimmik aatsitassarsiorfimmik pilersitsisoqarnissaa suliarisimagaat.

Maannalu mumingarluinnaanik aallartittoqarluni naalackersuisooqatigiit nikeriareernerisa kingorna.

Paasinarpoq inuiaqatigiit oqariartormata isumartik sumiitinnerlugu, piiaaqqusinngilluinnarnissamillu siunertaqartunut amerlanerussuteqartut qinersillutik, taanna atassummiit ataqqivarput.

Aajunali annertuumik apeqqut ingerlasoq; inuiaqatigiit eqqarsalersinniarneqassanngitsut inatsisartunut qinersisimaneq tassaasoq uranimut taasineq. Inatsimmi naalackersuisooqatigiit nikissangaluarpata allanngoqeratarsinnaammat, taamaalillunilu inerteqquteqarnerungaluaq atorunnaaqqilluni.

Sooq taava innuttaasut taasitinneqarniannngillat? Maanna takusinnaareerparput amerlanerussuteqartut inuiaqatigiinni uranimut naaggaarluinnarnermik isumaqartunut qinersisimasut, uteqqillugulu, taava soq isuma naqissusertinniarlugu innuttaasut taasitinneqassanngillat?

Ataasiartumik innuttaasunut taasisitsinikkut inatsisitigut illersorneqarsinnaasumik inissittoqassaaq, inuiaqatigiinniillu tunuliaqutserneqartumik inatsit eqqunneqarsinnaalluni, imaanngitsoq ukiut sisamakkaarlugit inatsimmik allanngorsinnaasumik suliaqartarluni.

Naak toqqammaviatigut siunertaasoq amerlanerussuteqartut qinersisimaneratigut ataqqilluinnaraluarlugu, siunnersuut Inuussutissarsiornermut Aatsatassanut ataatsimiitsitaliamit peqqissaarussamik suliarineqarnissaa Atassummiit kaammattuutingaarput. Qinersisimanermimi innuttaasut taasitinneqarsimanerattut isikkulerniarneqarnaversaartariaqarmat.